



पुक्तीक घन्टी नु गारो

आमोस

ब्रेक्ब मुर: आमोस आ नें आ अर्थ “कुरब मुर” बाक्ब। एको किताब मेकोमीन ब्रेक्शो बाक्ब। *आमोस ७:८; आमोस ८:१-२*

गेना ब्रेक्शो: आमोस यहूदा रागी डा बाक्त हना यो, उत्तर रागी, इस्राएल डा मुर आन कली “होस पा बाक्कीन” देंत। परमप्रभु यावेमी मेको कली सोइशो बाक्त। मेकोमी यहूदा डा पिप उज्जीयाह ७६२-७४० बि. सी. नु इस्राएल, उत्तर रागी डा पिप येरोबाम ७६३-७५३ बि. सी. क्येडा डोंइती ब्रेक्शो बाक्त। मेको उत्तर रागी रे खेरचा पुंडसे नोले ब्रेक्शो बाक्ब, देंनीम।

मारदे ब्रेक्शो: आमोसमी मुर आन मरिम्शो पतीके आ पर्बम ब्रेक्शो बाक्ब। मेना शोंप पाइशो वोंइश मुर नु मीश मुर आन शुश जचा तूचा, दूली निसाफ पचा नु फुडग आन कली दिप्चा आ पर्बम ब्रेक्शो बाक्ब। आमोसमी मेको आन कली हिंचा डा सजाइ ताइनीम, दे ब्रेक्शो बाक्ब। मिनु मेको सजाइ मार बाक्ब, दे यो ब्रेक्शो बाक्ब। तन्न नोले श्येत रे प्रोंइतीक आ पर्बम यो ब्रेक्शो बाक्ब। *आमोस ४:१; ६:४-६ आमोस ७:१-६; आमोस ८:१-१४; आमोस ९:१-६; आमोस ९:७-१५*

सजाइ ताइब रागी

१ एको आमोस आ लोत्र बाकब। आमोस तेकोहा सहरमी बाकब गोठला आन दाते डा का बाकत। परमप्रभु यावेमी मेको कली इस्राएल आ पर्वम लोत्र कोइताकब। मेना यहूदा डा पिप उज्जीयाह नु इस्राएल डा पिप योआश आ तौ येरोबाम बाकताकस। एको खिनु कुचा क्येडा बर्स निक्शी डोंइती डा लोत्र बाकब। *आमोस ७:१४; २राजा १५:१; जकरिया १४:५; २राजा १४:२३* २मिनु मेकोमी “परमप्रभु यावे सियोन रे ठेयब सेंदा पा ग्रीब। मेकोम यरूसलेम रे पा ठेयब सेंदाम लोत्र पाइब। गोठला आन बी ब्यफ आन जोतीक रू नेल्ल सोत्रब। मिनु कारमेल डांडा आ डर यो सोत्रब” देंत।

येरमीया २५:३०; योएल ४:१६

दमस्कस कली सजाइ गेशो

३मिनु परमप्रभु यावेमी मार देंत देशा हना “गो दमस्कस आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोपुकीमी गिलाद डा मुर आन कली फलाम के खुइ पाइशो दांदेमी दांइ पांमतेकम। *यसैया १७:१-३* ४मोपतीके गो हजाएल आ खिंमी मी सुइक्नुड। मेकोमी बेन-हादाद आ बोल्यो दरवार नेल्ल खतम पोक्ब। ५गो दमस्कस डा ठेयब लाप्यो डा आग्लो जिक्नुड। मिनु आवेन माइशो दिंमम बाकब मुर नेल्ल आन कली नु बेथ-एदेन डा पिप कली क्याम्नुडमी। अराम डा मुर आन कली ग्याइक्पाइशो कीर सहरमी लाइक्पाइक्नुडमी” दे परमप्रभु यावेमी देंत। *२राजा १६:६*

गाजा कली सजाइ गेशो

६मिनु परमप्रभु यावेमी “गो गाजा आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोमी शुश मुर आन कली ग्याइशो लाइशो एदोम आ गुइमी लेयतु। *२इतिहास २१:१६-१७; २इतिहास २८:१८; येरमीया ४७:१* ७मोपतीके गो गाजा डा गारोम मी सुइक्नुड। मेकोमी मेको आ बोल्यो दरवार खतम पोक्ब। ८गो अशदोद सहरम बाकब मुर आन कली नु अशकलोन डा पिप कली क्याम्नुडमी। गो एक्रोन कली युक्नुड। मिनु लीशो पलिस्ती नेल्ल जाम्शा लाइनीम” दे परमप्रभु यावेमी देंत।

टायर कली सजाइ गेशो

६मिनु परमप्रभु यावेमी “गो टायर आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोमी शुश मुर आन कली एदोम आ गुइमी गेप्टु। मिनु आंम लोक्ब आन दातेम पशो कबल प्रेंताकब। *यसैया २३:१; योएल ४:४; १राजा ५:२६* १०मोपतीके गो टायर डा गारोम मी सुइक्नुड। मिनु मेकोमी मेको आ बोल्यो दरवार खतम पोक्ब” दे परमप्रभु यावेमी देंत।

एदोम कली सजाइ गेशो

११मिनु परमप्रभु यावेम “गो एदोम आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोमी शिशी मपथु, आ लोक्ब आन कली तरवार शेशा, खेदा पाप्टु। मेको आ गाइशो गेना हना यो लीशा, ईख

कुरशा बाक्त। ओबदिया १०:२; ब्यवस्था २३:८; येरमीया ४६:७ १२मोपतीके गो तेमानम मी सुइक्नुड। मेकोमी बोझा डा बोल्यो दरवार खतम पोक्ब” दे परमप्रभु यावेमी देंत।

अम्मोन कली सजाइ गेशो

१३मिनु परमप्रभु यावेमी “गो अम्मोन आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोपुकीम गिलाद डा आल कुरशो मीश मुर आन कोव्रज तरवारम चेल्लेक्म। मेको आन रागी ठेयब सेल्चा कली मो पाम्तेक्म। येरमीया ४६:१-६ १४मोपतीके गो रब्बाह डा गारोम मी सुइक्नुड। मेकोम आन बोल्यो दरवार खतम पोक्ब। मिनु लडाइ पाइबपुकी शुश रेयके पा, फश गिवार खोदेशो पा जाक्शा, मेको आन कली खतम पोक्नीम। १५मेकेर डा पिप नु मेको आ ठेयब गेय पाइब मुर नेल्ल गयाइश्शा लाइक्चा पुंडसीनीम” दे परमप्रभु यावेमी देंत।

मोआब कली सजाइ गेशो

२ परमप्रभु यावेमी “गो मोआब आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोमी एदोम डा पिप आन रुश चोप्तु। यसैया १५:२; येरमीया ४८:२ २मोपतीके गो मोआब रागीम मी सुइक्नुड। मेकोमी गारो हिरशो केरयोथ डा बोल्यो दरवार खतम पोक्ब। मिनु मोआब डा मुर लडाइ, शुश रेयके नु तुराही ग्रीशोम बेक्नीम। ३गो मेको आ सासन पाइब नु मेको आ ठेयब गेय पाइब नेल्ल आन कली मेको नु काथा

साइक्नुडमी” दे परमप्रभु यावेमी देंत।
गन्ती २४:१७

यहूदा कली सजाइ गेशो

४मिनु परमप्रभु यावेमी “गो यहूदा आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोपुकीमी परमप्रभु यावे आ अरेशो लोव्र मटीम। आ फुल्लुम मुशा ब्रेक्शो लोव्र मपाम। मेकोपुकीम आन किकी पिपीम खोदेशो पा जोल लोव्र थमा सुइश्शा हेंथे गाक्तेक्म। ५मोपतीके गो यहूदा रागीम मी सुइक्नुड। मेकोमी यरूसलेम डा बोल्यो दरवार खतम पोक्ब” दे परमप्रभु यावेमी देंत। होसे ८:१४

इस्त्राएल कली सजाइ गेशो

६मिनु परमप्रभु यावेमी “गो इस्त्राएल आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोपुकीमी ठीक पाइब आन कली चांदी के क्येटीम नु मारेइ मथीब आन कली जोर का चेपल ताक्शा लेयतेक्म। आमोस ८:६ ७मिनु प्रुडग आन पिया फुरकुम खोल्शा दिम्नीम। श्येत जाइब आन कली नेप्शा गुंडनीम। पोबु निम्फा मीश आल का नु बाक्शा, आं नें ग्रांगा दिशो सेल्नीम। आमोस ८:४ ८मेको आन देवता थानम जाकटी वोइश्शो वा तार बाक्शा, सजाइ आ पा डा थाप्शो क्येटीम, अडगुर शांबु गयाप्शा तूनीम। प्रस्थान २२:२५

९गो मेको आन डोंइती रे एमोरी आन कली साइक्तामी। मेकोपुकी लेबानोन डा लाइश्शो रवा खोदेशो लाइश्शो नु बोल्यो बाक्तेक्म। गो मेको आन इर डा फल नु उइ आगा डा शाक्श नेल्ल

खतम सेलता। गन्ती २१:२१-२८ १० मिनु गो इन कली एमोरी आन रागी गेचा कली इजीप्त रागी रे गुंडशा ४० बर्स सम्म गोरशो रागीमी लां कोंइशा गाकपाइकतन्नी। ११ गो इन वोंइश आल आन दाते डा का निकशी आन कली आं लोव्र पाइब सेल्चा कली कोल्पाइकतामी। इन तौ आन दाते डा का निकशी आन कली नाजिरी दुम्पाइक्या कली कोल्पाइकतामी। ए इस्राएल डा मुरपुकी, मार एको लोव्र थमा ममाइ डा?” दे परमप्रभु यावेमी देंत। गन्ती ६:२-१३

१२ मिनु परमप्रभु यावेमी “तन्न गे मेको नाजिरी दुम्शो मुर आन कली अडगुर शांबु तूपाइकतीनी। आं लोव्र पाइब आन कली ‘परमप्रभु यावे आ लोव्र मपने’ दे माइकतीनी। आमोस ७:१३, १६; येरमीया ११:२१

१३ मोपतीके गे इन बाक्तीकेमी बाक्शा, इन कली बाला सुन्दा नलम ब्रीशो बग्गी दोपा हिम्बा, मोपा हिम्पाइकनन्नी। १४ थाम्पा दोरबपुकी प्रोक्चा मताइनीम। मिनु बोल्यो मुर आन बोल जाम्शा लाइब। सक्ति पाइशोपुकीम यो आंम कली प्रोंइने मचाप्नीम। १५ लिब्रा आप्बपुकी राप्ने मचाप्नीम। फेरेर पा दोरबपुकीमी यो आंम कली प्रोंइने मचाप्नीम। मिनु शारा डोइक्बपुकीम यो आंम कली प्रोंइने मचाप्नीम। १६ मेको नाक्त नेल्ल क्येडा सक्ति पाइशो आन दाते डा ठेयब थुं पाइशोपुकी शिशा प्रोक्नीम” दे परमप्रभु यावेमी देंत।

इस्राएल कली सजाइ

३ इस्राएल डा मुरपुकी, परमप्रभु यावेमी इन पर्वम लोव्र का पाप्तु। मेको लोव्र नेनीन। मेकोमी “एको लोव्र

इजीप्त रागी रे आं चाक्शो खिं डा मुर नेल्ल आन पर्वम बाक्ब। २ रागी डा खिं खिं डा मुर नेल्ल रे गो इन कली ला योव्रतन्नी। मोपतीके गो इन मरिम्शो पशो आ पर्वम सजाइ गेनुड। ब्यवस्था ४:३४ ३ मार, मुर निकशी मगारसा सम्म काथ काथा गाक्नीसी डा? ४ मार, सिखार मथित्तु हना, ब्वाकीम गुप्स ग्रीबा डा? मार, गुप्स आ चाइक्बम मारेइ मथित्तु मेको आ पुक्खीमी डरर डरर पाइबा डा? ५ मार, खपीम ब्वारद मदाइक्थु, चिक्ब रेप्बा डा? मार, ग्याइक्चा कली मारेइ मबाक्थु, थैम्लु खप रे ग्येत्थ बोक्नीमी डा? ६ मार, तेकोइ सहरमी तुराही ताप्शोनु, मुर महिनीमी डा? मार, सहरम श्येत दुम्मेनु, मेको परमप्रभु यावे आ सोइशो ममाइ डा? यसेया ४५:७; बिलाय ३:३७ ७ थमा पा, परमप्रभु यावेमी आ लोव्र पाइब आन कली मदेथु, मारेइ मपाइब। उत्पत्ती १८:१७ ८ गुप्स ग्रीशो नेशा, सु महिंबा? परमप्रभु यावे ब्वाक्मेनु, सुम आ लोव्र मपाइबा डा?

सामरीया कली सजाइ

६ ‘अशदोद डा बोल्यो दरवार नु इजीप्त रागी डा बोल्यो दरवार डा मुर आन कली गेपुकी सामरीया डा पहाडमी बुक्कीन। मिनु मेको सहरम दुम्शो ठेयब रेयके नु मुर आन कली श्येत गेशा, दिप्शो कोव्रडीन’ दे मुर आन कली देनीन। १० मेकोपुकी ठीक गेय पस मजोक्नीम। हुश ख्राक्श पोक्शा नु मार मार रोइशशा खुइ पशो आन बोल्यो दरवारम खेक्शा वोइक्नीम” दे परमप्रभु यावेमी देंत। ११ मोपतीके परमप्रभु यावेमी “इ जोरी सत्रुमी इ रागी

पुम्नीम। मेकोपुकीमी लडाइ तोव्रमेनु, गे बुइनीनी। मेकोमी इ बोल्यो दरवार नेल्ल रोइक्नीम” दे परमप्रभु यावेमी देंत। १२मिनु परमप्रभु यावेमी “दोपा गोठलामी गुप्स आ शोव रे भेडा आ खोइल निक्शी कि नोफा आ टुक्रा का ला हना यो रोइक्बा, मोपा सामरीयाम नित्तीक आ कुना नु खाटम बाक्शा यो इस्राएल डा मुर प्रॉइंचा पुंइसीनीम” देंत।

१३मुर नेल्ल आन परमप्रभु यावेमी “नेनीन, याकूब आ खिं डा मुर आन पर्बम सांकछी गेन। १४गो तेको नाक्त इस्राएल कली आ मरिम्शो पशो आ पर्बम सजाइ गेनुडा, मेको नाक्त गो बेथेल डा चढ़ेतीक कली यो सजाइ गेनुड। मिनु चढ़ेतीक डा गोव्रपुकी बेल्ला खपीम दोक्नीम। १५गो हिंडदमी बाक्तीक खिं नु हुप्शोमी बाक्तीक खिं निम्फा प्रेतनुड। मिनु हात्ती आ दाराम दारशो सेल्लो खिं ब्रेत्नीम। मिनु ठेयब खिंपुकी यो खतम सेल्लुड” दे परमप्रभु यावेमी देंत। १राजा २२:३६;

भजन संग्रह ४५:६

परमप्रभु गे मलेशशो

४ सामरीया डा डांडाम बाक्ब, बाशान डा बी खोदेंशो दोम्शो मीश मुर, गे प्रुडग आन कली दिप्नीनी। मारेइ मथीब आन कली फस पोक्नीनी। मिनु इन वोंइश आन कली “आंइ कली तूचा कली मार मार चाक्कीन” देंनीनी। २परमप्रभु यावेमी आ नेम कसम जशो बाक्ब। मेकोमी “नेनीन, इन कली कोंडगुम कीशा लाइक्नीम। इन लीशो आन कली बोलसीमी ब्वेक्शा लाइक्तीक नाक्त जाक्ब। ३गे नेल्ल का का पा एर ओंथ मकोव्रथु, गारो आ पोव्रला रे पा

लाइनीनी। मिनु गे हारमोन मेर ताइक्चा पुंइसीनीनी” दे परमप्रभु यावेमी देंत। हारमोन हिब्रू लोव मार बाक्ब, दे मतुइक्नीम। ४मिनु परमप्रभु यावेमी “बेथेल सहरम लशा, मरिम्शो पने। गिल्गालमी लशा, मेको क्येडा यो शुश मरिम्शो पने। सुनी कुस कुस इन चढ़ेतीक चाक्कीन। नाक्त सां सांमी इन १० भाग डा भाग का चाक्कीन। होसे १२:१२; व्यवस्था १४:२८ ५आं कली “गे इस्राएल डा मुर, रिम्शो पाइब बाक्नीनी” दे बोरब ओरुत्ती सुप्शो शोब्ले चढ़ेपने। मिनु थुंम ग्येरशा चढ़ेतीक आ पर्बम ठेयब लोव्र पना पन गाक्कीन। मारदे हना गे मोदेंशो पचा दाक्नीनी” दे परमप्रभु यावेमी देंत। लेवी २:११

६मिनु परमप्रभु यावेमी “इन कली, सहर नेल्लेमी श्येत्थ कोव्रज नु शोब्ले जचा मतशो सेल्लन्नी। मो हना यो गेपुकी आं गे मलेन्नी” दे परमप्रभु यावेमी देंत।

७मिनु “गो इन अन्न खुप्चा क्येडा महिना सां डोंइती रेउ मयिपदु। गो सहर का कली रेउ यिपाइक्ता, अर्को सहर कली मयिपदु। मिनु रू कामी रेउ यिपाइक्ता, अर्को रूम मयिपदु। मिनु मेको सोव्रत। १राजा १७:१ ८मोपतीके मुरपुकी सहर सहर रे ब्वाक्कु तूचा कली सहर काम जाक्तेक्म। तन्न रूथ्री तूचा मताम। मो हना यो गेपुकी आं गे मलेन्नी” दे परमप्रभु यावेमी देंत।

९मिनु परमप्रभु यावेमी “गो इन फल फुल रू नु अडगुर रूम सोव्रतीक नु बुक्खी डाइक्तीक रोइ सोइक्ताक्ड। सल्ला मालेमी इन फोव्रशी रवा नु तेल रवा आन कली नेक्पाइक्तामी। मो हना यो गेपुकी आं गे मलेन्नी। हाग्यै १:११; योएल १:४ १०गो इन दातेम इजीप्त

रागी कली खोदेंशो पा बेक्चा डा रोइ सोइक्ताक्ड। गो इन ठिटा आन कली तरवारमी क्योरशा साइक्पाइक्तामी। इन शारा रोइक्पाइक्तामी। इन बाक्तीक डा मरिम्शो रिना इन नें आगाम प्रिताक्ड। मो हना यो गेपुकी आं गे मलेन्नी” दे परमप्रभु यावेमी देंत। प्रस्थान ६:३

११ मिनु परमप्रभु यावेमी “गो इन दाते डा का निक्शी आन कली सोदोम नु गोमोररा कली खोदेंशो पा खतम सेल्ता। गे ब्रशो मी रे पा ग्रुइशो बुल्सी खोदेंशो बाक्तीनी। मो हना यो गेपुकी आं गे मलेन्नी” दे परमप्रभु यावेमी देंत। उत्पत्ती १६:२४-२५; जकरिया ३:२

१२ मोपतीके परमप्रभु यावेमी “ए इस्राएल डा मुरपुकी, गो इन कली मार पाइनुड देंशा हना, गे इन परमप्रभु, आं कली ग्रुम्चा माल्नीनी। १३ सुमी डांडा आन कली सेला, मेकोमी फश यो सेल्शो बाक्ब। मेकोमी मुर आन कली आ मिम्शो तुइक्पाइक्ब। मेकोमी सुनी कली छिडछिड सेल्ब। मिनु रागी डा लाइशो डांडा मेर गाक्ब। मेको आ नें मुर नेल्ल आन परमप्रभु यावे बाक्ब” देंत। मीका १:३

इस्राएली आन परबम रोंका पशो

५ मिनु आमोसमी “ए इस्राएल आ खिं डा मुरपुकी, इन परबम आं रोंका पशो नेनीन। २ आं मीश आल इस्राएल लेंशा गेनायो मबोक्चा डा पा गोल्लत। मेको आ रागीमीन प्रोंइचा पुंडसीशो बाक्ब। मेको कली पोक्ब सुइ मबाक्नीम” देंत। ३ मिनु परमप्रभु यावेमी “तेकोइ सहर रे इस्राएल आ परबम हजार का जना मुर ग्रूतेक्म हना, सहे का जना ला लीनीम। सहे का जना ग्रूतेक्म हना, १० जना मुर ला लीनीम” देंत।

दिण्व आन परबम लोत्र पशो

४ मिनु परमप्रभु यावेमी इस्राएल आ खिं डा मुर आन कली “आं कली मलीन। मिनु ब्रोनीन। ५ बेथेल कली ममलीन। मिनु गिल्गाल मलने। बेयर-शेबामी मगाक्कीन। मारदे हना गिल्गाल डा मुर थमा पा ग्याइशो लाइक्चा पुंडसीनीम। मिनु बेथेल खतम दुम्ब। आमोस ४:४; होसे ४:१५

६ परमप्रभु यावे कली मलीने। मिनु ब्रोंइचा ताइनीनी। मो मपाइतीनी हना, मेको मी खोदेंशो पा गाइशो योसेफ आ खिंम मी सुइक्ब। बेथेल कली खतम पोक्ब। मेको मी कली काण्व सुइ मबाक्नीम। आमोस ६:१२; यसैया ५:२० ७ गेपुकी ठीक निसाफ कली दूली सेल्नीनी। ठीक पतीक कली खतम सेल्नीनी। ८ सोरुल आन कली सेल्ब, हिंचा डा छिडछिड रे सुनी डा हाम्सो सेल्ब, नाक्ती कली छिडछिड सेल्ब नु समुन्द्र डा ब्वाक्कु कली ब्रेशशा रागीमी मोइक्ब। आं नें परमप्रभु यावे बाक्ब। अच्युब ३८:३१; आमोस ६:६ ९ मेकोमी बोल्यो आन कली रीब पा खतम सेल्ब। मिनु आन बोल्यो दरवार खतम दुम्नीम।

१० मेकोपुकीम निसाफ पतीके लाण्चोम निशशा अरेब कली काइ मदाक्नीम। मिनु थमा लोत्र पाइब आन कली प्रांघ्रा दिन्नीम। यसैया २६:२१ ११ मारदे हना गे पुडग आन कली दिम्नीनी। मेको आन कली गेन कि गेन, दे शुश अन्न थाप्पाइक्नीनी। गे खोइशो फुल्लु के खिं सेल्तीनी। तन्न मेकेर बाक्चा मताइनीनी। रिम्शो अडगुर रू सेल्तीनी। तन्न अडगुर शांबु तूचा मताइनीनी। सेफन्याह १:१३

१२ मारदे हना गो इन शुश मरिम्शो पशो तुइक्नुड। गो इन पाप गिश ठेयब बाक्बा, मेको तुइक्नुड। गे ठीक पाइब आन कली श्येत गेनीनी। घूस ताकनीनी। निसाफ पतीकेमी मारेइ मथीब आन कली नेप्शा गुंडनीनी। १३ मोपतीके निप्स पाइशो मुर सिक्सी पा बाक्नीम। मारदे हना इस्राएलम काइ मरिम्शो दुम्शो बाक्ब।

१४ गे ब्रॉइशा बाक्चा कली रिम्शो पचा मलीन। मरिम्शो पचा ममलीन। मिनु मुर नेल्ल आन परमप्रभु यावे गे नु बाक्ब। १५ मरिम्शो पतीक कली काइ मदाक्तीन। रिम्शो पतीक कली दाक्तीन। ठेयब लाप्चोमी ठीक निसाफ पने। मिनु मुर नेल्ल आन परमप्रभु यावेमी योसेफ आ लीशो मुर आन कली शिशी पाइबा कों?” दे परमप्रभु यावेमी देंत। *भजन संग्रह ३४:१५; रोमी १२:६*

१६ मोपतीके मुर नेल्ल आन परमप्रभु यावेमी “लां डा मुर नेल्ल डाक्शा, रोंका पचा माल्नीम। आबी आबी, देंचा माल्नीम। रूम गेय पाइब आन कली रोंका पचा कली ब्रेत्तीन। रोंका पस जोक्ब आन कली यो ब्रेत्तीन। १७ अडगुर रू नेल्लेमी रोंका पचा माल्नीम। मारदे हना गो इन दाते रे पा गाक्शा लाइनुड” दे परमप्रभु यावेमी देंत।

परमप्रभु आ निसाफ पतीके नाक्त

१८ मिनु परमप्रभु यावेमी “मारदे गे परमप्रभु यावे आ नाक्त जाक्शो दाक्नीनी? मारदे परमप्रभु यावे आ निसाफ पतीक नाक्त माल्नीनी? मेको नाक्त छिडछिड दुम्ब, छेडछेड मदुम्ब। *योएल २:११* १९ मेको नाक्ती मुर का गुप्स रे प्रोक्शा, वां कली गुम्शो खोदेशो बाक्ब।

खिं लशा बाक्चा कली आ गुइ गारोम वोदानु, बुस्सुम कोक्शो खोदेशो दुम्ब। २० परमप्रभु यावे आ नाक्त छिडछिड दुम्ब। छेडछेड मदुम्ब। मेको छिडछिडमी छेडछेड काइ मबाक्ब।

२१ गो इन चाड नु इन गुम्तीक आन कली काइ मदाक्नुड। *यसैया १:११-१५* २२ गे आं कली चोशा चढ़ेतीक नु अन्न चढ़ेतीक चढ़ेतीनी हना यो, गो मेको मब्राइनुड। मिनु इन नेल्ल क्येडा दोम्शो बस्तु दुशा बाक्चा आ पर्वम चढ़ेशो यो मकोव्रनुड। *मीका ६:६-७* २३ इन कुम्सो आन रेयके आं क्येडा डोन वोतीन। इन तार पाइशो ठेयब ताप्तीके ताप्शो नेंचा मदाक्नुड। २४ तन्न ठीक निसाफ पतीक ब्वाक्क खोदेशो पा शाइक्पतीन। ठीक पतीक गेनायो मसोव्रब खोला खोदेशो पा शाइक्पतीन।

२५ गे इस्राएल आ खिं डा मुरपुकी गोरशो रागीम ४० बर्स गाक्नीनु, आं कली चढ़ेनी डा? *येरमीया ७:२२-२४; प्रेरित ७:४२-४३* २६ गेपुकीमी इन पिप देवता साकुथ नु इन सौरुल देवता काइवान आस कली कुरशा लतीन। मेको आंमा इन कली सेल्शो मूर्ति बाक्नीसी। २७ मोपतीके गो इन कली ग्याइशशा, दमस्कस क्येडा डोन लाइक्पाइक्नन्नी” दे परमप्रभु यावेम देंत। मेको आ नें मुर नेल्ल आन परमप्रभु यावे बाक्ब।

ठेयब लेशो आन कली हुइशो

६ मिनु “आबी, सियोन डा ठेयब मुर, मेकोपुकीमी सामरीया डा डांडामी ‘गो रिम्शो बाक्नीकी’ दे मिम्नीम। इस्राएल डा मुरपुकीमी मेको आन कली थमा सुइशशा, जाक्नीम। २ गे आइक्ची

हांबु काल्नेह सहर लशा, कोव्रडीन।
मिनु मेकेर रे ठेयब हमाथ रागी लन।
मेको नोले पलिस्ती आन गाथ सहरमी
लने। इन राज्य मेको आन राज्य क्येडा
रिम्शो बाकबा डा? मार, मेको इन रागी
मेको आन रागी क्येडा ठेयब बाकबा
डा? उत्पत्ती १०:१० ३गे 'श्येत जतीक
नाक्त मजाकब' दे मिम्नीनी। मिनु गे हुश
ख्राकश पोक्ब सासन पाइब चाक्नीनी।

भजन संग्रह १०:५

४आबी, मेको हात्ती आ दारा के सेल्शो
खाटमी इप्नीमी। आन इप्तीकेमी गोल्शा
बाक्नीमी। मेकोपुकीम क्यारश भेडा
आन पाठा नु गोठ डा बाछा ब्वाइनीमी।
५मेकोपुकीम हेंथे कुम्सो पा तार पाइश्शो
ठेयब ताप्तीक ताप्नीमी। मिनु 'गो दाऊद
खोदेशो पा ताप्तीक सेलनुड' दे मिम्नीम।
यसैया ५:१२ ६मेकोपुकीम डाप्काम अडगुर
शांबु तूनीमी। नेल्ल क्येडा रिम्शो तेल
खेक्सीनीमी। तन्न योसेफ आ खिं डा
मुरुम श्येत जामेनु, सुर्ता मपाइनीम।
७मोपतीके मेको नेल्ल क्येडा डोंडती
ग्याइश्शा लाइक्चा पुंडुसीनीम। मोपा
मेको आन चाड पतीके, ग्येरशा बाक्तीक
नाक्त नुक्ब" देंत।

इस्त्राएल डा मुर आन ठेयब लेशशो

८परमप्रभु यावेमी आ नेमी कसम जशो
बाक्ब। मिनु मुर नेल्ल आन परमप्रभु
यावेमी "गो याकूब आ ठेयब लेशशो तशा
ग्रांग्रा दीनुड। मेको आ बोल्यो दरवार
आन कली काइ मदाक्नुड। गो एको सहर
नु आ मार मार नेल्ल आन जोरी सत्रु आन
गुडमी गेनुडमी" देशो बाक्ब।

९खिं काम १० जना मुर लीतेकम हना
यो, मेको नेल्ल बेक्नीम। १०मिनु खिं डा

मुर कामी मेको आन बेक्शो रां चोइब,
खिं आगा रे बेक्शो मुर गुंडचा कली
जाक्शा, मेकेर खुइक्ब का कली "गेपुकी
नु अरु सुइ बाक्नीमी?" दे हिल्लो पाइब।
मिनु मेकोमी "मबाक्ब" देंब। मिनु खिं
डा मुरुमी "सिक्सी पावो। गोपुकीमी
परमप्रभु यावे आ नें थिचा मदुम्ब" देंब।
आमोस ८:३ ११मारदे हना परमप्रभु यावेमी
हुकुम पाइब। मिनु ठेयब खिं कली प्रेक्ब।
मिनु आइक्च खिं यो प्रेक्ब। १२मेकोमी
"मार, शारा रोंगुम दोरनीमी डा? मार,
मेकेर ब्यफ वाक्नीमी डा? तन्न गोपुकीम
ठीक निसाफ कली दूली सेल्लतीनी। ठीक
पतीक कली कशो सेल्लतीनी। आमोस ५:७
१३गेपुकी लो-देबार सहर आ पर्बम
ग्येरसाक्नी। मिनु 'मार, गोपुकीमी इं
सक्तिम कारनाइम सहर मग्रासे डा?'
देंनीनी। १४ए इस्राएल आ खिं डा
मुरपुकी, गो इन पर्बम रागी का डा मुर
आन कली पोक्नुडमी। मिनु मेकोपुकीमी
इन कली लेबो-हेमाथ रे अराबाह डा
खोला सम्म श्येत गेशा खेदा पाइनीम"
दे मुर नेल्ल आन परमप्रभु यावेमी देंत।

सल्ला माले कोंइशो

७ परमप्रभु यावेमी आं कली मार
कोंइताक्यी देशा हना, पिप आ
बाली नाली खुप्ने थुम्शा, अर्को बाली
वामानु, मेकोम मारेइ मारेइ नेक्ब सल्ला
माले आन कली ठीक पशो ताता। २मिनु
मेकोपुकीमी रू डा घांस नेल्ल नेक्गमे
नोले गो "परमप्रभु यावे माफ गेयीनी।
याकूब आ रागी दोपा ब्रोंइने चाप्बा डा?
मारदे हना मेको थम आइक्च बाक्ब"
देंती। ३मिनु परमप्रभु यावेमी "मेको
मोदेशो मदुम्ब" देंत।

मी कोंइशो

४मिनु परमप्रभु यावेमी आं कली मार कोंइताक्यी देंशा हना परमप्रभु यावेमी आं कली ब्रशो मी का कोंइताक्यी। मिनु मेको मीम ठेयब समुन्द्र कली सोव्रपाइवतु। मिनु रागी कली यो नेवतु।
 उत्पत्ती ७:११ ५मिनु गो “परमप्रभु यावे नाइवतीन, दे गो इन कली पुंइनुड। याकूब आ रागी दोपा ब्रोंइने चापबा डा? मारदे हना मेको थम आइक्च बाक्ब” देंती। ६मिनु परमप्रभु यावेमी “मोदेंशो यो मदुम्ब” देंत।

गारो प्रोव्रतीक घन्टी कोंइशो

७मिनु परमप्रभु यावेमी आं कली मार कोंइताक्यी देंशा हना, परमप्रभु यावे गारो काम गारो प्रोव्रतीक घन्टी शेशा, राप्शो बाक्त। ८मिनु परमप्रभु यावेमी आं कली “आमोस गे मार तवी?” दे हिल्लो पाप्तु। मिनु गो “गारो प्रोव्रतीक घन्टी का ताता” देंती। मिनु परमप्रभुमी “कोव्रडो, गो आं मुर इस्राएली आन दातेमी गारो प्रोव्रतीक घन्टी का क्युकनुड। मिनु मुल गो मेको आन नेक्था बाक्शा, मार पाइक्वाक्मा, कोव्रनुडमी। यसैया ३४:११; आमोस ८:२ ९इसहाक आ डांडा डा थान खतम दुम्नीम। मिनु इस्राएल डा थान नेल्ल ब्रेशा जाम्शा लाइनीम। मिनु गो तरवार शेशा येरोबाम आ खिं डा मुर साइक्चा कली बोक्शा लाइनुड” देंत।

आमोस नु अमस्याह

१०मिनु बेथेल डा चढेब अमस्याहमी इस्राएल डा पिप येरोबाम कली “इस्राएल आ खिं डा मुर आन दातेमी इस्राएलम

बाक्ब आमोसमी इन पर्बम मरिम्शो पाइब। एको रागीमी मेको आ लोव्र फाल्ने मचापब। ११आमोसमी “येरोबाम तरवारम साइक्चा पुंइसीब। मिनु इस्राएल डा मुर आन रागी रे ग्याइश्शा लाइक्चा पुंइसीनीम’ देंशो बाक्ब” दे आमोसमी देंत। १२मिनु अमस्याहमी आमोस कली “ए, परमप्रभु यावे आ लोव्र पाइब, गे एक रे प्रोक्शा यहूदा रागी लावो। मिनु मेकेर क्येट चेम्शा शोब्ले ग्याप्शा जशा, परमप्रभु यावे आ लोव्र पावो। १सामुएल ६:९ १३बेथेलमी लेंशा गेनायो परमप्रभु यावे आ लोव्र मपावो। मारदे हना मेको पिप आ देवी देवता थान नु राज्य डा पूजा पतीके बाक्ब” देंत। १राजा १२:२८-२९ १४मिनु आमोसमी अमस्याह कली “गो परमप्रभु यावे आ लोव्र पाइब मनड। मिनु परमप्रभु यावे आ लोव्र पाइब आ तौ यो मनड। गो दा गोठला का नु फोव्रशी रवा कोव्रब मुर नड। १५मिनु परमप्रभु यावेमी आं कली क्यारश भेडा योव्रतीक रे ब्रेत्ताक्यी। मिनु मेकोमी आं कली ‘लावो। आं मुर इस्राएली आन कली आं लोव्र शेंदीमी’ दे माइक्ती। १६मोपतीके मुल परमप्रभु यावे आ लोव्र नेनीन। गे आं कली ‘इस्राएल आ पर्बम परमप्रभु यावे आ लोव्र मपावो। मिनु इसहाक आ खिं डा मुर आन पर्बम लोव्र मपावो’ देंतीनी। आमोस २:१२ १७मोपतीके परमप्रभु यावेमी इ कली ‘इ मीश सहरम तेल्लेम का दुम्ब। इ तमी तौ नेल्ल तरवारमी क्योरचा पुंइसीनीम। मिनु इ रागी पुक्शा योक्सीनीम। गे चहिं ग्रांग्रा दिशो रागी काम बेक्नेवे। मिनु इस्राएल थमा पा आ रागी रे ग्याइश्शा लाइक्चा पुंइसीब’ ” दे आमोसमी अमस्याह कली देंत।

मीशो फोव्रशीम ब्रीशो डालो

८ मिनु परमप्रभु यावेमी आं कली मीशो फोव्रशीम ब्रीशो डालो का कोइताकयी। २मिनु मेकोमी आं कली “आमोस, गे मार तवी?” दे हिल्लो पती। मिनु गो “मीशो फोव्रशीम ब्रीशो डालो का ताता” देंती। मिनु परमप्रभु यावेमी आं कली “आं मुर, इस्राएली आन नाक्त गाप्त। मुल गो मेको आन नेक्था बाक्शा, मार मार पाइनीमी, मेको कोव्रनुडमी। आमोस ७:८ ३मेको नाक्ती दरवारम कुम्सो पाइब आन कुम्सो रोंका पतीके दुम्नीम” दे परमप्रभु यावेमी देंत। मिनु मेकोमी “बेक्शो मुर शुश बाक्नीम। लाडगाम गुंडशा ताइक्नीम। गे सिक्सी पावो” देंत।

आमोस ६:१०

इस्राएल खतम दुम्शो

४मिनु परमप्रभु यावेमी “गे मारेइ मथीब आन कली दिम्बपुकी नु रागी डा प्रुडग आन कली खतम सेल्बपुकी, नेनीन। आमोस २:७ ५गेपुकीमी ‘औंसी गेना लाक्बा डा? गो अन्न लेयचा ताइनीकी। नाइक्तीक नाक्त गेना लाक्बा डा? गो चेरब लेयचा ताइनीकी। गो एफाह आइक्च सेल्शा, शेकेल कली हेल्शो सेल्शा नु दूली पा नाक्शा, शुश क्येट चेम्नीकी’ देंनीनी। एफाह का २२ लिटर लाडब पुक्तीक बाक्ब। शेकेल का ११.५ ग्राम डा क्येट बाक्ब। नेहेम्याह १३:१५ ६गेपुकीम ‘प्रुडग आन कली चांदीम ग्याप्नीकी। मारेइ मथीब आन कली जोर का चेपलमी ग्याप्नीकी। मिनु मक्राप्शो चेरब लेयनीकी’ देंनीनी” देंत।

आमोस २:६

७परमप्रभु यावेमी याकूब आ सोशो

बोशो मिम्शा, कसम जाप्तु। मार कसम जाप्तु देंशा हना “गो मेको आन पशो गेनायो मप्रेंनुड। ९मार, मेको आ पतीके रागी खिंखि मपाइबा डा? मेकेर बाक्ब नेल्लेमी रोंका मपाइनीमी डा? रागी नेल्ल नील खोला खोदेंशो पा बारनीम। इजीप्त रागी डा नील खोला बारशा ग्युम्शो खोदेंशो पा नुप्शा लाइनीम। आमोस ६:५

६गो मेको नाक्ती नां कली नाक्ती उइक्थ दुम्मेनु, लाक्पाइक्नुड। मिनु नाक्त बाक्ना बाक्न नां रिक्पाइक्नुड। येरमीया १५:६ १०गो इन चाड कली रोंका पतीक सेल्लुड। इन कुम्सो नेल्ल आन कली डाक्तीक सेल्लुड। गो नेल्ल इन कली अरन्डी फेक्पाइश्शा चां प्रेक्पाइक्नुड। गो आंम का ला बाक्शो तौ आ पर्वम रोंका पशो खोदेंशो दुम्पाइक्नुड। मेको चाड नुप्पतीक नाक्त कशो नाक्त दुम्ब” देंशो बाक्ब। येरमीया ६:२६

११मिनु परमप्रभु यावेमी “गोम अन्काल सोइक्ची ना, थमा पा श्येत जतीक नाक्त जाक्ब। मेको अन्काल जचा नु तूचा के अन्काल ममाइ, तन्न परमप्रभु यावे आ लोव्र नेंतीक अन्काल बाक्ब। १सामुएल ३:१ १२मुरपुकी परमप्रभु यावे आ लोव्र माल्शा, समुन्द्र का रे अर्को समुन्द्र सम्म लाइनीम। उत्तर रे पूर्व सम्म लाइनीम। मेकोपुकी एर ओंथ गाक्शा, परमप्रभु यावे आ लोव्र माल्नीमी। तन्न मथिल्नीम।

१३मेको नाक्ती दारशो मीश आल नु बोल्यो वोंइश आल ब्वाक्कु तूचा मतथु, थाइनीम। १४सु सु सामरीया डा देवता अशीमाह आ नेमी कसम जशा ‘ए दान, इ देवता ब्रोंइशा बाक्शो खोदेंशो पा’ नु ‘बेयर-शेबा डा देवता ब्रोंइशा बाक्शो खोदेंशो पा’ देंशा कसम जाइब नेल्ल

गेनायो मबोक्चा डा पा गोलनीम” दे परमप्रभु यावेमी देंत। *न्यायाधीस १८:३०*

नोले डा दुम्तीक कोंइशो

६ गो परमप्रभु कली चढेतीक आ नेक्था राप्शो ताता। मिनु मेकोमी आं कली “लाप्चो डा शी शुश हिम्पाइक्चा कली थाम आन डर तुपो। मिनु ब्रेशशा मुर नेल्ल आन पिया तार दोक्नीम। मिनु ब्रोंइशा लीशो आन कली तरवारमी क्योरनुडमी। मेको आन दाते डा का यो प्रोक्चा मताइनीम। का यो ब्रोंइचा मताइनीम।

७ मेकोपुकी बेक्शो मुर आन बाक्तीक लाम्तेक्म हना यो, मेकेर रे कीशा गुंडनुड। मिनु मेकोपुकी इर सरीड गे डोइश्शा लाम्तेक्म हना यो, गो मेको आन कली ग्याइश्शा लुक्च फ्रुप्नुडमी। *अय्युब २६:६; भजन संग्रह १३६:८* ८ मेकोपुकी कारमेल डांडामी खुंडसाक्म हना यो, गो मेको आन कली माल्शा, ग्याइश्शा चाक्नुडमी। मेकोपुकी आं क्येडा खुइश्शा समुन्द्र आगाम लाम्तेक्म हना यो, समुन्द्रम बाक्ब बुस्स कली ‘मेको आन कली कोक्मी’ दे अरेनुड। मिनु मेकोमी मेको आन कली कोक्ब। ९ मेको आन जोरी सत्रु आन डोंइती ग्याइश्शा लाइक्चा पुंडसाक्म हना यो, गो मेको आन कली क्योरशा साइक्चा कली तरवार कली अरेनुड। मिनु मेकोमी साइक्ब। गो मेको आन कली रिम्शो पचा कली ममाइ, तन्न मरिम्शो पचा कली कोव्रनुडमी” देंत।

१० मिनु मुर नेल्ल आन परमप्रभु यावेमी रागी कली थिप्तु हना, रागी याइब। मिनु मेकेर बाक्ब नेल्ल रोंका पाइनीम। मिनु

रागी नेल्ल नील खोला खोदेशो पा बारब। मिनु इजीप्त डा नील खोला खोदेशो पा सोव्रब। *आमोस ८:८* ६ मेकोमी स्वर्गम आ बाक्तीक सेल्ब। मिनु रागीमी मेको आ जग वोइक्ब। समुन्द्र डा ब्वाक्कु कली ब्रेशशा, रागीम मोइक्ब। मेको आ नें परमप्रभु यावे बाक्ब। *भजन संग्रह १०४:३; आमोस ५:८*

७ मिनु परमप्रभु यावेमी इस्राएल डा मुर आन कली “गे आं कली एथीयोपीया डा मुर खोदेशो बाक्नीनी। गो इस्राएली आन कली इजीप्त रागी रे, पलिस्ती आन कली काफ्तोर रागी रे नु अरामी आन कली कीर रागी रे गुंडशा चाक्शो मनडमी डा?” देशो बाक्ब। *ब्यवस्था ७:७; येरमीया ४७:४* ८ परमप्रभु यावेमी शुश पाप पाइब राज्य कली कोव्रना कोव्रन बाक्ब। मेकोमी “गो मेको आन कली रागी रे क्याम्नुड। मो हना यो गो याक्ब आ खिं कली चहिं नेल्ल मक्याम्नुड” दे परमप्रभु यावेमी देंत।

९ परमप्रभु यावेमी “गो मार हुकुम पाइनुडमी देशा हना, इस्राएल आ खिं डा मुर आन कली जात नेल्ल डा मुर आन दातेमी ग्योलोमी मार मार क्राप्शो खोदेशो पा, क्राप्नुडमी। मिनु इम्चीली फुल्लु का यो खपीम मदोक्ब। १० मेकोपुकीम ‘हिंचा डा श्येत आंइ तारी मजाक्ब। इं कली मेकोम मथिप्ब’ दे पाप पाइब, आं मुर नेल्ल तरवारमी साइक्चा पुंडसीनीम” देंत। *आमोस ६:३*

इस्राएल कली लेंशा सेल्शो

११ परमप्रभु यावे, इन परमप्रभुमी “गो मेको नाक्त दाऊद आ ब्रेशशा खिं आन कली लेंशा सेल्नुड। मिनु मेको आ ब्रेशशा

गारो आ पोवला सुइनुड। मिनु मोपा नेल्ल साइ डोंइती डा खोदेशो सेल्लुड।
 १२ राजा १२:१६; प्रेरित १५:१६-१७ १२ मिनु मेकोपुकीम एदोम डा लीशो नु आं नें पाइशो जात जात डा मुर नेल्ल आन के दुम्नीम” दे मोदेशो पाइब परमप्रभु यावेमी देंत।

१३ मिनु परमप्रभु यावेमी “मेको नाक्त थमा पा जाक्ब। बाली नाली खुप्बमी ब्यफ वाक्ब कली गुम्ब। मिनु वांचेर ब्वारबमी अडगुर खुम्ब कली गुम्ब। डांडा रे पा नक अडगुर रस याप्ब। मिनु डांडा नेल्ल

अन्न बाला सिल्लीम। लेवी २६:५; योएल ४:१८ १४ गो आं मुर इस्राएली आन कली आन मार मार लेशशा गेनुडमी। मिनु मेको आन ब्रेशशो सहर कली लेंशा सेल्लशा, मेकेर बाक्नीम। मेकोपुकीम अडगुर खुम्शा, अडगुर शांबु तूनीम। मेकोपुकीम फल फुल खुम्शा, मेको आन फल जाइनीम।

ब्यवस्था ३०:३; यसैया ६५:२१ १५ गो मेको आन कली गेनायो मखेरपांडसीचा डा पा आन रागीमी वोइक्नुड। आं गेशो रागी रे मेको आन कली सुइमी गुंइने मचाप्नीम, दे इन परमप्रभु यावेमी देंशो बाक्ब” देंत।